

De Beebaa go Esther

Hanu dagodo o de beebaa nei

De Beebaa go Esther e dee iloo danuaa be goai ne siia, gai ne sisi i daha de ngadau e 470 B.C., e sisi ai hegau ne hai i de hale o de hodooligi o Persia, go Ahasuerus,* i de madaaolo go Susa. Gai e tala ai hogi taalanga o Esther, dahi damaa hine dau i magavaa o de gau Ssuu. Ia ne hai bodu ange gi de hodooligi o Persia, gai se hine lo taane ma de hai hegau ange e hagaola ono dangada. Deelaai, ia ne hagaola gilaadeu mai i olaadeu hagadaumee, gi dee daia ai gilaadeu gi maakau. De beebaa nei e tala de hai ne daamada ai taonga a de gau Ssuu go de *Purim*, ma dono hagadoonunga.

Dahi gubu hagamogomogo: “Gai noo koe e noho donu huu ga dee muu i de masavaa nei, gai de ilaage ma de hagaola o de gau Ssuu e humai naa i dahi mommee gee, aagai koe ma doo huaabodu e maakau donu. Gai goai e iloo, be koe tee hili ange naa gi tuulanga o de hine hodooligi, i hiidinga o de masavaa bee nei?” (4.14).

Denga vaevaenga

Esther gu hai go de hine hodooligi (1.1–2.23)

Hagatau a Haman (3.1–5.14)

De daa o Haman ga magau (6.1–7.10)

De hagadee kii o hagadaumee o de gau Ssuu (8.1–10.3)

* : *Ahasuerus* e bei go Xerxes.

De dugu o de hine hodooligi go Vashti

¹ Aanei mee ne hai i de masavaa o Ahasuerus e hodooligi ai; deenei Ahasuerus ne hodooligi laa i e 127 vaaenga, mai i India ga hano ai gi Ethiopia.*

² De masavaa o de hodooligi go Ahasuerus e dagi i dono nohoanga hodooligi, i de madaaolo go Susa, ³ gai ia ne hai ange dahi daonga i tolu ngadau o dono hodooligi, gi ono dangada aamua ma de gau hai hegau. Gai denga dagi o de hebagi o Persia ma Media, ma dagi o de henua, ma de gau aamua mai i denga vaaenga alodahi gu loomai gi taonga.

⁴ Gai ia ga hagaago ange dagodo de lava laumalie o dono nohoanga hodooligi ma tanuaa aama de mahamaha o dono hodooligi i e 180 laangi.

⁵ Gai ga odi ange huu laangi laa, gai de hodooligi ga hai hogi dahi daonga, i e hidu ange laangi, ange gi dangada alodahi i de madaaolo go Susa, mai i tangada maolunga ga dae ai gi tangada maolalo, i lo te veelenga i de hale o de hodooligi.

⁶ Gai de mommee laa e daudau age ai *linen* tea ma de buluu ma e hagalaagii ai, gai e noonooa ange gi denga buulei selevaa i denga duludulu *marble* i daula *linen* tea ma de *purple*. Gai denga mommee nnoho e hai i goolo ma selevaa ma e hagatuu i hongaga de mommee gu hola i hadu hagalaagii, ma denga *marble* ma denga baa, aama denga hagadaangaa hadu hagamogomogo ange laa.

⁷ Denga ubu e unu ai ni ubu goolo, denga ubu nei e dagodo geegee alodahi, gai uvaini a de hodooligi e lagolago mmao, bei dagodo o dono lava.

* **1:1** Ezra 4.6

⁸ Gai de hainga gu hagamodu i dagodo o mee unu bolo e dee hai gi de mahi dahi dangada, go hiidinga de hodoologi gu hagailoo ange gi dagi i dono hale alodahi bolo gilaadeu gi haia gi bei lodo o dahi ma dahi.

⁹ Gai de hine hodoologi go Vashti ne hai hogi dahi daonga ange gi denga haahine i de hale o de hodoologi go Ahasuerus.

¹⁰ Gai de hagahidu laangi huu, i de masavaa o de hodoologi gu senga ai i de unu uvaini, gai ia ga hai ange gi Mehuman, ma Biztha, ma Harbona, ma Bigtha, ma Abagtha, ma Zethar, aama Carcas, go denga *eunuch* dogohidu e hai hegau laa i ono mada i mua,

¹¹ gilaadeu gi gaamai de hine hodoologi go Vashti, ma dono hau hodoologi, e hagaago ange ai gi dangada, ma denga dagi dagodo o dono mahamaha, go hiidinga ia se hine mahamaha.

¹² Aagai de hine hodoologi go Vashti tee lodo e hai gi bei muna a de hodoologi ange gi de ia mai i daho denga *eunuch*. Gai de hodoologi gu lili mmao, ma de mahanahana iho ono lodo.

¹³ Gai deenei tahulinga a de hodoologi e hai: ia e ssili i daho denga daane e iloo dagodo o de hainga ma de hagamodu soe, gai ia ne hai ange gi denga daane heiangi e tonu ange gi dagodo o de masavaa,

¹⁴ ma de paa ange gi de hodoologi — go Carshena, ma Shethar, ma Admatha, ma Tarshish, ma Meres, ma Marsena aama Memucan, aanei denga dagi aamua e dogohidu o Persia ma Media e maua i de hulo gi mada i mua o de hodoologi, gai ni dangada maolunga i de nohoanga hodoologi.

15 Gai ia ne ssili, “Se aha gu hagamodu i de hainga bolo e hai ange gi de hine hodoologi go Vashti, go hiidinga ia tee daudali i muna a de hodoologi go Ahasuerus ne tala ange gi de ia i daho denga *eunuch*?”

16 Gai Memucan ne hai ange gi de hodoologi ma denga dagi, “De hine hodoologi, go Vashti, tee hai ange donu huu de hegau nei gi de hodoologi, aagai ia ne hai baasi ange donu hogi gi denga dagi aama dangada alodahi, i denga vaaenga o de hodoologi go Ahasuerus.

17 De masavaa naa huu a denga haahine alodahi e langona ai hegau a de hine hodoologi gu hai, gai gilaadeu e hagangadi mee naa hogi olaadeu bodu, ga hagataba, ‘De hodoologi go Ahasuerus ne aalu de hine hodoologi go Vashti gi humai gi ono mada i mua, aagai ia tee humai.’

18 Anailaa nei gai denga haahine maolunga o Persia ma Media e langona hegau a de hine hodoologi ne hai, gai gilaadeu e pasa ange naa hogi bee nei gi de gau aamua alodahi o de hodoologi. Gai e hai naa ga deai selaadeu hagadubu ma de-laadeu lili.

19 Gai noo de hodoologi e malangilangi, gai ia gi haia dahi hagailoo, ga sisi i lodo hainga o Persia ma Media, e dee maua laa gi sui, bolo Vashti gu dee ahe mai ange gi daho de hodoologi go Ahasuerus; gai tuulanga o de hine hodoologi gi gaavange gi dahi hahine e danuaa ange laa i de ia.

20 Gai de masavaa naa huu e hagailoo ai muna a de hodoologi, i denga mommee alodahi i dono no-hoanga hodoologi laumalie nei, gai denga haahine

alodahi ga hagamodubodu olaadeu bodu, mai i de hine maolunga ga dae ai gi de hine maolalo.”

²¹ Gai de hodoooligi ma denga dahi o de henua gu malangilangi i de hagasaele laa, gai de hodoooligi ga hagamodubodu muna a Memucan.

²² Ia ne kave denga leda gi mommee alodahi o dono nohoanga hodoooligi i denga vaaenga alodahi i siianga ma muna o dahi henua ma dahi henua, bolo denga daane alodahi gi dahi i olaadeu huaabodu.

2

Esther gu hai go de hine hodoooligi

¹ Dua huu mee nei, gai de hodoooligi go Ahasuerus gu helui dono lili, gai ia gu manadua Vashti, ma ana mee ne hai aama de hai ne hagamodubodu ai ono dagodo.

² Gai denga daane e haia ange mee a de hodoooligi ne hai ange gi de ia, “Haia gi saalaa denga bua moe mahamaha gaamai gi daho de hodoooligi.

³ Gai de hodoooligi gi hilia hanu dahi i denga vaaenga alodahi i dono nohoanga hodoooligi gi gaamai denga bua moe mahamaha gi de hale o denga haahine i de madaaolo go Susa. Gaavange gilaadeu gi Hegai de *eunuch* o de hodoooligi e diiloo ange laa denga haahine; ga gaavange gi gilaadeu mee e hagamahamaha ai olaadeu angaanga.

⁴ Gai tamaa hine naa huu o de hodoooligi e malangilangi ai, gai ia gi gaavee tuulanga o de hine hodoooligi go Vashti.” Gai de hodoooligi gu malangilangi i muna laa, gai ia ga hai gu bei muna laa.

⁵ Gai e dahi daane Ssuu e noho i de madaaolo go Susa, dono ingoo go Mordecai, tama daane a

Jair, tama daane a Shimei, tama daane a Kish, se dangada de aamuli o Benjamin,

⁶ gai ia se daane nii Nebuchadnezzar, de hodooligi o Babylon, ne kave gee mai i Jerusalem, madali dangada ne gaavee gee madali Jehoiachin,* de hodooligi o Judah.

⁷ Gai ia ne haele Hadassah, dahi ono ingoo laa go Esther, go hiidinga gu deai donu sono damana be se dinana. Ia se damaa hine nii dahi daina o maadua o Mordecai. Gai tamaa hine laa e mahamaha luono mada ma dono angaanga. Gai de masavaa huu ne maakau ai luono maadua, gai Mordecai ga kave ia ga haele maana.

⁸ Gai de masavaa huu ne hagailoo ai muna a de hodooligi, gai gu gaamai denga damaa hine soa gi de madaaolo go Susa, ga gaavange gi Hegai gi diiloo ange. Gai Esther gu gaamai hogi gi de hale o de hodooligi, ga dugu i daho Hegai, go taane e diiloo ange denga haahine.

⁹ Gai Hegai gu malangilangi i tamaa hine laa, gai ia ga abodonu ange gi de ia, ga hagamoolau ga gaavange gi de ia mee e hagamahamaha ai dono angaanga, ma ana gai, aama ono haahine hai hegau e dogohidu, ne hili mai i de hale o de hodooligi, ma de gaavange gi de ia ma ono haahine hai hegau de mommee danuaa hugadoo i de hale o denga haahine.

¹⁰ Gai Esther tigi tala donu be ia se dangada hee, gai be goai dono huaabodu, go hiidinga Mordecai gu hai ange ia gi dee daalaa.

* **2:6 Jehoiachin:** de Beebaa Hebrew e hai ange bolo go *Jeconiah*.

¹¹ Gai laangi alodahi gai Mordecai e aheahe saele i ma te buibui o de hale o denga haahine gi iloo ai e ia dagodo o Esther, aama mee gu dai hai ange gi de ia.

¹² I mua de hano o dahi damaa hine laa gi daho de hodoologi go Ahasuerus, gai e hai ange gi de ia mee e hagamahamaha ai ia i e madaangahulu ma lua malama, bei dagodo o de hainga ange gi denga haahine; e ono malama o denga lolo *myrrh*, gai e ono malama o denga vai hagamaanongi ma mee hulu e haganuaa ai ia.

¹³ Gai deenei dono hai e hano ai gi daho de hodoologi: mee alodahi oona e lodo ai e gaavange e kave madali ia mai i de hale o denga haahine gi de hale o de hodoologi.

¹⁴ Gai tamaa hine e hano gi daho de hodoologi i de ahiahi, gai taiao age naa huu gai ia gu ahe mai ga hano gi de lua hale o denga haahine ga noho ai i lalo o Shaashgaz, de *eunuch* o de hodoologi e diiloo ina ange laa denga bodu laa daha o de hodoologi. Gai ia tee ahe ange gi daho de hodoologi, ga dae ai gi de lodo o de hodoologi i de ia, ga aalu mai ia.

¹⁵ Gai de masavaa huu o Esther (go tamaa hine a Abihail, taina o dahi luu maadua o Mordecai, gai ia ne daohi ia e hai ai dana damaa hine) e hano ai gi daho de hodoologi, gai ia tee dangidangi i hanu mee gee, gai go mee donu huu a Hegai, de *eunuch* o de hodoologi, taane e diiloo ange laa denga haahine, ne tala ange gi de ia. Gai dangada alodahi ne gidee laa Esther ne malangilangi i de ia.

¹⁶ Gai ia ne gaavee gi daho de hodoologi go Ahasuerus, i dono hale i de madaangahulu malama go

Tebeth,[†] i de hidu ngadau oona ne hodoologi ai.

¹⁷ Gai de hodoologi ne kii ange dono aloha i Esther i dono aloha i denga haahine ange laa alodahi, gai de hodoologi gu kii ange dono malangilangi i de ia i dono malangilangi i denga bua moe ange laa. Gai ia ga hagenda ange de hau hodoologi gi hongga dono biho, ga hai ia go de hine hodoologi e sui ai Vashti.

¹⁸ Gai de hodoologi ga hai taonga laumalie ange gi Esther, ga gauna ange de gau aamua alodahi ma ono dangada hai hegau gi taonga. Ia tee hai gilaadeu gi hagao ina taagisese, gai ne ngadi gaa-vange mee gi dangada i denga vaaenga alodahi.

De hagaola a Mordecai de mouli o de hodoologi

¹⁹ De masavaa huu ne hagabuni ai denga bua moe i de lua hanonga, gai Mordecai gu noho i de haitoga o de hale o de hodoologi.

²⁰ Gai Esther tigi tala donu be ia se dangada hee, gai be goai dono huaabodu, bei de hai a Mordecai gu tala ange ai gi de ia. Gai Esther ne duudagi de daudali i muna a Mordecai, bei dono hai ne daudali ai i ana muna, i de masavaa a Mordecai ne haele age ai ia.

²¹ De masavaa laa gai Mordecai e noho i de haitoga o de buibui o de hodoologi. Gai Bighthana ma Teresh, luu *eunuch* o de hodoologi e hagaloosia de haitoga, gilaau ne lili ga hagatale de daa gi magau de hodoologi go Ahasuerus.

²² Gai de masavaa huu a Mordecai ne langona ai mee nei, gai ia ga tala ange gi de hine hodoologi go

[†] **2:16** *Tebeth* e bei go daha Daholaa (December) ma Madaligi (January).

Esther, gai Esther ga tala ange gi de hodoooligi, bolo go Mordecai ne hagailoo ina mai mee nei.

²³ Gai de masavaa huu ne ssala ai e hagadonu mee nei, gai gu gidee mai bolo se muna abodonu. Gai gilaadeu ga kave luu daane laa ga daudau i hongga e dagidahi laagau. Gai mee nei gu sisi i lodo beebaa daohi i mada luu mada o de hodoooligi.

3

De hagatau e daa gi maakau de gau Ssuu

¹ Dua huu mee nei, gai de hodoooligi go Ahasuerus ga hili ange Haman, tama daane a Hammedatha, taane Agag, gi dahi duulanga maolunga, gai de hodoooligi ne hai ia gi maolunga ange i de gau aamua ange laa.

² Gai de gau hai hegau alodahi o de hodoooligi e nnoho laa i de haitoga o de hale o de hodoooligi ne ino gi lalo ga hagadubu Haman, go hiidinga de hodoooligi gu hagadaba bolo gi haia de mee nei. Aagai Mordecai tee ino ange donu aabe ne hagadubu Haman.

³ Gai de gau hai hegau o de hodoooligi i de haitoga o de hale o de hodoooligi ga hai ange gi Mordecai, “Gu aha goe gu dee daudali ai naa i muna a de hodoooligi?”

⁴ Gai ga dee modu huu delaadeu pasa ange gi de ia i de mee nei, gai ia e dee hagallongo ange gi gilaadeu. Gai gilaadeu ga tala ange gi Haman, e tilo ai be Mordecai e ino ange laa gi de ia be deai; gai ia gu tala ange gi gilaadeu bolo ia se dangada Ssuu.

⁵ Gai ga gidee huu e Haman bolo Mordecai e dee ino ange donu gi de ia aabe e hagadubu ia, gai ia gu kona mmao de lili.

⁶ Aagai ia tee lodo donu huu e daa Mordecai gi magau, go hiidinga ia gu iloo be goai dangada o Mordecai. Gai ia ne ssala de hai e daa ai gi maakau dangada alodahi o Mordecai, go de gau Ssuu, e nnoho laa i de nohoanga hodooligi o Ahasuerus.

⁷ Gai de madaangahulu ma lua ngadau huu o Ahasuerus ne hodooligi ai, i tahi malama go Nisan,* gai gilaadeu ne dada de laagau e hagaingoo ange laa go de *Pur* i mada i mua o Haman i laangi laa, i denga malama alodahi ga dae ai gi de madaangahulu ma lua malama go Adar.†

⁸ Gai Haman ne hai ange gi de hodooligi go Ahasuerus, “E dahi hagabuulingaa dangada e nnoho i denga vaaenga o doo nohoanga hodooligi; alaadeu hainga e dagodo gee ma hainga a dangada ange laa, gai gilaadeu e dee daudali i hainga a de hodooligi; e deai haigamaiana de golomagi ange lodo o de hodooligi gi gilaadeu.

⁹ Gai noo de hodooligi e malangilangi, gai ia gi haia dahi hagailoo e daa ai gilaadeu gi maakau, gai au ne gaavange gi gilaadeu e haia hegau a de hodooligi e dahisemada *talent*‡ selevaa, gilaadeu gi haoa gi lo te mommee doange a de hodooligi.”

¹⁰ Gai de hodooligi ga unusi de buulei i dono lima ga gaavange gi Haman, tama daane a

* **3:7** *Nisan* e bei go daha Manu (March) ma Idiidi (April). † **3:7** *Adar* e bei go daha Daagelo (February) ma Manu (March). ‡ **3:9** *10,000 talente* bei se 375 dana.

Hammedatha, taane Agag, de hagadaumee o de gau Ssuu.

¹¹ Gai de hodoologi ga hai ange gi Haman, “Dugua donu huu au sseene, gai haia be ni aha aau e lodo e hai ange gi de gau Ssuu.”

¹² Gai de madaangahulu ma dolu laangi huu o tahi malama, gai gu hagahi gi loomai de gau sisi o de hodoologi. Gai gilaadeu ga sisi dahi hagailoo gi bei muna alodahi a Haman, ga kave gi dagi o denga vaaenga, ma denga goobenaa o denga vaaenga alodahi, aama dagi alodahi o de henua. Gai muna laa ne sisi i siianga ma muna a denga hagadaangaa dangada alodahi, i de ingoo o de hodoologi go Ahasuerus, ga maaga i de hagailonga o de buulei o de hodoologi.

¹³ Gai dangada ne gaavee leda laa ne hai gi hulo gi denga vaaenga alodahi o de hodoologi, gai gilaadeu ga daa ai gi maakau de gau Ssuu alodahi — denga dama daane ma de gau madumaatua, ma denga gauligi ma denga haahine — i dahi laangi daudahi, go de madaangahulu ma dolu laangi o de madaangahulu ma lua malama go Adar, ga kave olaadeu golea alodahi.

¹⁴ Gai gilaadeu ne langa de hagailoo laa ga hai gi se hainga i denga vaaenga alodahi, ma de hai gi iloo e denga huaadangada alodahi, gi paba ange ai gilaadeu gi de laangi laa.

¹⁵ Gai de gau ne gaavee laa de hagailoo, ne hag-amoolau ga hulo i hiidinga muna a de hodoologi; gai muna laa ne hagailoo hogi i de madaaolo go Susa. Dua mee laa gai de hodoologi ma Haman ne nnoho ga unu, aagai dangada i de aduhale go Susa gu dee tonu ange gi de hagailoo laa.

4

Mordecai e ssala de bale mai i daho Esther

¹ Gai de masavaa huu a Mordecai ne langona ai mee gu hai laa, gai ia ga saesae ono malo, ga gahu i malo daladala aama de hagamalili ange lehu gi hongā dono biho. Gai ia ne oo ga dangi ga hano ai gi lo te aduhale;

² gai ia ne hano ga duu i ma te haitoga o de hale o de hoolooligi, go hiidinga e deai donu se dangada e maua i de ulu i lo te buibui o de hoolooligi noo ia e gahu i malo daladala.

³ Gai de gau Ssuu i denga vaaenga alodahi gu tae laa aagena muna a de hoolooligi aama dana hagailoo, gu daemaha mmao olaadeu lodo, gai gilaadeu ga hagahiikai, ma de tangi aama de tangi see; gai ne soa gilaadeu ne kahu i malo daladala ga daakodo ai i lodo lehu.

⁴ Gai de masavaa o denga haahine hai hegau ma denga *eunuch* ne tala ange ai gi Esther mee laa, gai ia gu dee baba mmao ono lodo. Gai ia ga kave hanu malo e sui ai malo o Mordecai, aagai ia tee lodo e kave.

⁵ Gai Esther ga hagahi Hathach, dahi *eunuch* a de hoolooligi gu hili ange laa gi haia hegau a Esther, ga hai ia gi hano gi daho Mordecai gi diiloo be ni aha gu hai, gai aahee hiidinga.

⁶ Gai Hathak ga hano gi daho Mordecai i lo te duu malaēae o de aduhale i ma te haitoga o de hale o de hoolooligi,

⁷ gai Mordecai ga tala ange gi Hathak mee alo-dahi gu hai ange gi de ia, aama taelodo o denga sseene a Haman gu hagatoo donu bolo ia e hagao

ange de hodoologi, gai ia ga daa ai gi maakau de gau Ssuu.

⁸ Gai ia ne gaavange gi de ia dahi beebaa ne langa ai laa de hagailoo gu duha saele laa i Susa, i dagodo de daa gi maakau o de gau Ssuu, ia gi hagaagona ange gi Esther ma de hagadonu ange gi de ia. Gai ia gi usuusu ina ange Esther gi hano gi mada i mua o de hodoologi, gi dangidangi hagamahi ange ai, ia gi abodonu ange gi ono dangada.

⁹ Gai Hathak ga ahe mai ga tala ange muna a Mordecai gi Esther.

¹⁰ Gai Esther ne kave ange hogi Hathak gi daalaa ange gi Mordecai, gi hai ange,

¹¹ “De gau hai hegau alodahi ma dangada i vaaenga o de hodoologi e iloo, bolo tangada e hano e ulu gi lo te mommee iai de nohoanga o de hodoologi, gai de hodoologi tee aalu ia, gai e dahi donu huu hainga ange gi de ia – ia e daa donu gi magau. Deelaa donu huu, noo de hodoologi e haalo ange gi de ia dana laagau hodoologi gi ola ai dono mouli. Gai gu matolu odi huu laangi a de hodoologi tee aalu mai ai au.”

¹² Gai gilaadeu ne tala ange muna a Esther gi Mordecai.

¹³ Gai Mordecai ne hagaaha muna nei gi Esther, “Koe e dee maanadu bolo go koe donu huu e ola i de gau Ssuu alodahi, i hiidinga koe e noho i de hale o de hodoologi.

¹⁴ Gai noo koe e noho donu huu ga dee muu i de masavaa nei, gai de ilaage ma de hagaola o de gau Ssuu e humai naa i dahi mommee gee, aagai koe ma doo huaabodu e maakau donu. Gai goai e

iloo, be koe tee hili ange naa gi tuulanga o de hine hodoologi, i hiidinga o de masavaa bee nei?”

¹⁵ Gai Esther ne hai gilaadeu gi daalaa ange muna nei gi Mordecai,

¹⁶ “Hannoo hagabuni ina de gau Ssuu alodahi i Susa, gai goodou ga hagahiikai i ogu hiidinga; goodou e dee gaimee donu, aabe unu i e dolu laangi ma e dolu boo. Gai gimaadeu ma ogu haahine hai hegau e hagahiikai naa hogi madali goodou. Dua naa huu mee nei, gai au ga hano gi daho de hodoologi, e dee galemu donu e hai baasi ange gi de hainga. Gai noo au gu magau, gai au gu magau.”

¹⁷ Gai Mordecai ne hai ga bei mee alodahi a Esther gu tala ange ia gi haia.

5

Taonga ange gi de hodoologi ma Haman

¹ Gai dua huu de hagadolu laangi, gai Esther ga gahu i malo o de hine hodoologi, ga hano ga duu i lo te buibui o de hale o de hodoologi, i ma te aabi iai de nohoanga hodoologi. Gai de hodoologi e noho i hongga dono nohoanga ma e huli ange ai gi de haitoga.

² Gai ga gidee huu e ia de hine hodoologi go Esther e duu i lo te buibui, gai ia gu malangilangi ga haalo ange de laagau hodoologi goolo e poo laa i dono lima. Gai Esther ga humai ga hagabaa ange ga poo ma te laagau hodoologi laa.

³ Gai de hodoologi ga hai ange, “De hine hodoologi go Esther, se aha oou e lodo e dangidangi ai? Gai e gaavadu donu gi de goe,

ga dae ai loo gi dahi luu baasi o dogu nohoanga hodoooligi.”

⁴ Gai Esther ga hai ange, “Noo e danuaa mai i daho de hodoooligi, gai au e lodo e gauna adu gooluu ma Haman gi loomai gi taonga aagu e hagadabena ange gi de hodoooligi.”

⁵ Gai de hodoooligi ga hai ange, “Goodou hag-amoolau gaamai Haman, gai gimaau ga hulo e hai gi bei muna a Esther.”

Gai de hodoooligi ma Haman ga hulo ai loo e gaimee i taonga a Esther gu hagadabena laa.

⁶ Gai de hodoooligi ne hai ange gi Esther, i de masavaa alaa e unu ai uvaini, “Se aha ouu e lodo ai? Au e gaavadu naa donu gi de goe. Gai se aha naa huu ouu e lodo e dangidangi ai? Gai e gaavadu naa donu gi de goe, ga dae ai loo gi dahi luu baasi o dogu nohoanga hodoooligi.”

⁷ Gai Esther ga basa ange, ga hai ange, “Deenei dogu mee e lodo ai aama dagu dangidangi:

⁸ noo de hodoooligi e abodonu mai gi de au, gai e malangilangi i de gaamai aama de hagasula dogu mee e dangidangi ai, gai au e lodo de hodoooligi ma Haman gi aahe mai ange gi taonga aagu e hagadabena adu gi gooluu daiao. Gai au ga hai gi bei muna a de hodoooligi.”

De hagatau e daa Mordecai gi magau

⁹ Gai Haman ga sao ga hano i de laangi laa gu malangilangi mmao ma de lodo danuaa. Aagai de masavaa huu a Haman ne gidee ai Mordecai i gaogao de haitoga o de hale o de hodoooligi, ia tee duu age donu aabe ne hagadubu Haman, gai Haman gu kona mmao dono lili i Mordecai.

¹⁰ Gai Haman ne golomagi ono lodo ga hano gi dono hale.

Gai ia ga aalu ga gaamai ono soa aama dono bodu go Zeresh,

¹¹ ga tala hagasoenga ange gi gilaadeu dagodo o dono lava, ma de soa ana dama, aama de hagamua a de hodooligi ia, ma de hai ia gi maolunga ange i denga dagi o de henua ma de gau hai hegau o de hodooligi.

¹² Gai Haman ne hai ange hogi, “De hine hodooligi go Esther tee gauna ange dahi dangada gee madali de hodooligi gi dana daonga, gai go au donu huu. Daiao gai ia gu gauna mai hogi au madali de hodooligi gi dana daonga.

¹³ Aagai mee nei alodahi e deai donu haigamiana i taulooloa dagu gidee Mordecai, taane Ssuu, e noho laa i gaogao de haitoga o de hale o de hodooligi.”

¹⁴ Gai dono bodu go Zeresh ma ono soa alodahi ne hai ange gi de ia, “Hagaduulia dahi laagau gi madalima sugilima de maolunga, gai koe ga hai ange gi de hodooligi daiao gi daudaulia ai Mordecai. Gai koe ga hano madali de hodooligi gi taonga ma de malangilangi.” Gai Haman gu malangilangi i muna laa, ga hai gilaadeu gi hagaduulia dahi laagau daudau.

6

De hagadubu a de hodooligi Mordecai

¹ De boo laa gai de hodooligi tee maua gi seni, gai ia ga hagadaba bolo gi gaamai de beebaa e daohi ai mee gu hai i denga ngadau gu hulo, gi daulia ange gi de ia.

² Gai gu gidee i lo te beebaa laa dagodo de tala a Mordecai mee a Bigthana ma Teresh ne hai, gilaau ni *eunuch* e hagaloosi ina de haitoga o de hoolooligi, gai gilaau ne hagatale de daa gi magau de hoolooligi go Ahasuerus.*

³ Gai de hoolooligi ga ssili, “Ni aha gu hai laa e hagadubu ai Mordecai i dana hegau ne hai?”

Gai denga daane e haia hegau i mada i mua o de hoolooligi ga hai ange, “Tigi ai donu mee ne hai e hagadubu ai ia.”

⁴ Gai de hoolooligi ne ssili, “Goai i lo te buibui?” De masavaa laa gai Haman se goodo ulu mai donu huu, gi lo te mommee e mua gi daha i de hale o de hoolooligi, e basa ange ai gi de hoolooligi, i de daudau o Mordecai i hongga de laagau aana gu hagadabena ange laa gi de ia.

⁵ Gai denga daane hai hegau o de hoolooligi ga hai ange, “Go Haman.”

Gai de hoolooligi ga hai ange, “Hagaulu ina mai ia.”

⁶ Deelaai ai, Haman gu ulu mai, gai de hoolooligi ne ssili ange gi de ia, “Se aha e hai ange gi tangada a de hoolooligi gu lodo e hagadubu?”

Gai Haman ga hagadaba i ono lodo, “Goai ange naa donu a de hoolooligi e lodo e hagadubu, e dee go au?”

⁷ Gai Haman ga hai ange gi de hoolooligi, “Deenei dau mee e hai ange gi taane aau e lodo e hagadubu:

⁸ gaamai hanu malo o de hoolooligi gu gahu ai laa ma gi hakahu ina ange ai ia, ma de hoosa o de

* 6:2 Est 2.21-22

hooligi gu savini ai laa, gai gi gaavange dahi hau gi honga de biho o de hoosa laa;

⁹ ga gaavange denga malo ma de hoosa laa gi dahi dahi aamua o de hooligi, gai ia gi hano gi hakahudia ange taane a de hooligi gu lodo e hagadubu ga hakage ange ia gi honga de hoosa, ga dahi de hoosa laa lo te aduhale, ga hagadaba, ‘Deenei de hai a de hooligi e hagadubu ai tangada aana gu lodo laa e hagadubu.’”

¹⁰ Gai de hooligi ga hai ange gi Haman, “Hag-amoolau hannoo gaavee de malo ma de hoosa naa, bei dau hai gu tala mai ai naa, ma gi haia ange mee naa gi Mordecai, taane Ssuu, go de ia e noho laa i gaogao de haitoga o de hale o de hooligi. Gai koe haia donu gi bei muna alodahi aau gu tala mai naa.”

¹¹ Gai Haman ne kave malo laa ga hakahu ange ai Mordecai, ga hai ia gi gage ange gi honga de hoosa laa, ga dahi ia laa lo te aduhale, gai ia ga hano i ono mada i mua ga hagadaba, “Deenei de hai a de hooligi e hagadubu ai tangada aana e malangilangi laa i de hagadubu.”

¹² Dua mee nei gai Mordecai ne ahe gi de haitoga o de hale o de hooligi. Aagai Haman ne hag-amoolau ga hano gi dono hale, ga haoli dono biho i hiidinga de daemaha ono lodo.

¹³ Gai ia ga tala ange gi dono bodu go Zeresh, ma ono soa mee alodahi gu hai ange laa gi de ia.

Gai ono daane heiangi ma Zeresh ga hai ange gi de ia, “Go hiidinga Mordecai, taane ne haia naa goe ga daamada de doo gi lalo, se dangada Ssuu, koe e dee maua donu i de hai baasi ange gi de ia, aagai koe e dee maua naa donu gi kii i de ia.”

De daudau o Haman i de laagau

¹⁴ Gai de masavaa alaadeu e tala ange ai muna laa gi de ia, gai gu tae mai denga *eunuch* o de hodooligi e kave Haman gi taonga a Esther gu hagadabena laa.

7

¹ Gai de hodooligi ma Haman ne hulo gi taonga i daho de hine hodooligi go Esther.

² Gai de hodooligi ga hai ange hogi gi Esther, i de masavaa olaadeu e unu ai uvaini i de hagalua laangi, “De hine hodooligi go Esther, se aha ouu e lodo e dangidangi mai ai? Be se aha naa huu ouu e dangidangi ai, gai e hai donu gi bei, ga dae ai loo gi dahi luu baasi o dogu nohoanga hodooligi.”

³ Gai de hine hodooligi go Esther ne basa ange ga hai ange, “De hodooligi, noo koe e abodonu mai gi de au, gai noo e danuaa mai i oo daha, deenei dagu dangidangi. Au e dangidangi adu koe gi hagaola ina dogu mouli aama mouli o ogu dangada.

⁴ Go hiidinga gimaadeu ma ogu dangada gu hagao e daa gi maakau ma de hai gi odi i teai. Noo gimaadeu ne hagao gi daha e hai ai denga daane ma haahine hai hegau, gai e deai donu agu muna, go hiidinga e dee se mee e heohi ai de hakoso de hodooligi.”

⁵ Gai de hodooligi go Ahasuerus ga ssili ange gi Esther, de hine hodooligi, “Goai, gai go hee donu iai tangada gu maanadu naa bolo ia e hai de hegau naa?”

⁶ Gai Esther ga hai ange, “Ia se hagadaumee e kino i gimaadeu! Go Haman taane baubau naa!”

Gai Haman gu madagu i de hodoologi ma de hine hodoologi.

⁷ Gai de hodoologi ga duu age i de kona mmao de lili, ga hano gi lo te veelenga o de hale o de hodoologi. Aagai Haman gu donu iho bolo de hodoologi gu lava donu i de hagamodu e hagaduasala ia, deelaai, ia ne noho ga dangidangi ange gi de hine hodoologi go Esther gi hagaola ina dono mouli.

⁸ Gai ga ahe mai huu de hodoologi i de veelenga o de hale o de hodoologi gi de mommee e hai ai laa taonga, gai ia gu gidee Haman gu hagabagu ange gi hongade mee dagodo o Esther e noho ai laa.

Gai de hodoologi ga hagadaba, “Ia ga hai gi de mahi nei donu hogi de hine hodoologi, i de masavaa oogu e noho ai i de hale?”

De masavaa a de hodoologi ne tala ai muna nei, gai de gau hai hegau ga haoli luu mada o Haman.

⁹ Gai Harbona, dahi *eunuch* e haia hegau i mada i mua o de hodoologi, ga hai ange, “Tilo, dahi mommee daudau, se madalima sugilima de maolunga, e duu i gaogao de hale o Haman; ia ne hai e daudau age ai Mordecai, taane ne hagaola ina de mouli o de hodoologi.”

Gai de hodoologi ga hai ange, “Gaavee ia daudaulia ange aagena.”

¹⁰ Gai gilaadeu ga daudau Haman i hongade laagau aana ne hagaduu laa e daudau ai Mordecai, gai de hodoologi gu ahe dono lili.

8

De dugu ange de gau Ssuu gi hai baasi

¹ De laangi laa gai de hodooligi go Ahasuerus ne gaavange mee a Haman, de hagadaumee o de gau Ssuu, gi de hine hodooligi go Esther. Gai Mordecai gu humai gi mada i mua o de hodooligi, go hiidinga Esther gu tala bolo gilaau ni hai dangada.

² Gai de hodooligi ga unusi dono buulei, aana ne kave gee laa i daho Haman ga gaavange gi Mordecai. Gai Esther ne hai Mordecai gi huahua i mee alodahi a Haman.

³ Gai Esther ne dangidangi ange hogi gi de hodooligi, ma de duuduli i gaogao luono vae ma de dangi. Ia ne dangidangi ange ia gi haia gi dee sula de hagatau baubau a Haman, taane Agag gu hagasauaa laa e daa ai gi maakau de gau Ssuu.

⁴ Gai de hodooligi ga haalo ange dana laagau hodooligi goolo gi Esther, gai Esther ga hidi age ga duu i mada i mua o de hodooligi.

⁵ Gai Esther ne hai ange, “Noo e heohi mai i daho de hodooligi, gai noo ia e abodonu mai gi de au, ma de malangilangi i de au, gai de hodooligi gi haia dahi hagailoo gi suuia ai denga leda a Haman, tama daane a Hammedatha, taane Agag, gu sisi laa e daa ai gi maakau de gau Ssuu e nnoho i vaaenga alodahi o de hodooligi.

⁶ Dee hee dagu hai e maua ai i de tilo de hai ngadaa gu dai hai ange nei gi ogu dangada? Gai dee hee dagu hai e maua ai i de tilo de daia ga maakau o ogu dangada?”

⁷ Gai de hodooligi go Ahasuerus ga hai ange gi de hine hodooligi go Esther ma Mordecai, taane Ssuu, “Tilo, au gu gaavange gi Esther mee alodahi a Haman, go hiidinga ia ne hagatale de daa de gau

Ssuu. Gai au gu hai gilaadeu gi daudau ina ia i de laagau laa.

⁸ Gai gooluu aahe ange siia dahi hagailoo i de ingoo o de hodoooligi, ange gi de gau Ssuu, ooluu muna e llodo e sisi, ga hagailonga i de buulei o de hodoooligi, go hiidinga de hagailoo e sisi laa i de ingoo o de hodoooligi ga maaga i dono buulei, e dee maua donu i de sui.”

⁹ Gai gu hagahi gi hagabuni de gau sisi o de hodoooligi i tolu malama, go Sivan,* i de madalua ma dolu laangi. Gai gilaadeu ne sisi de hagailoo a Mordecai ange gi de gau Ssuu, ma ange gi dagi o denga vaaenga, ma goobenaa, aama de gau aamua o denga henua e 127, mai i India ga dae ai gi Ethiopia. Gai de hagailoo laa ne sisi i denga siianga ma muna a dahi henua ma dahi henua, ma dahi huaadangada ma dahi huaadangada, aama siianga ma muna hogi a de gau Ssuu.

¹⁰ Gai muna laa ne sisi i de ingoo o de hodoooligi go Ahasuerus ga maaga i dono buulei hagailonga, gai ne gaavee e gilaadeu e saavini i hoosa kemo ne hagadili i denga hoosa a de hodoooligi.

¹¹ Gai de hagailoo a de hodoooligi i lodo leda laa ne hai gi maua e de gau Ssuu, i denga aduhale alodahi gi hagabuni gi buibuia gilaadeu; gi oohaa ai ma de hebagi, ma de daa gi maakau denga huaahenua aabe go dangada o hanu vaaenga, e hagabuni laa e hebagi ange gi gilaadeu, ga daa gilaadeu ma alaadeu dama ma denga haahine, ga kave olaadeu golea.

* **8:9** *Sivan* e bei go daha Salaboli (May) ma Alamooi (June).

¹² Gai de laangi ne daamada ai de hai mee nei i denga vaaenga alodahi o de hodooligi go Ahasuerus, go de madaangahulu ma dolu laangi o de madaangahulu ma lua malama go Adar.†

¹³ Gai ne langa muna i de hagailoo ne hai laa ga se hainga ga kave gi denga vaaenga alodahi, ma de hai gi iloo e dangada alodahi. Gai de gau Ssuu gi hagadabena i de laangi laa gi suuia ange mee a olaadeu hagadaumee e hai ange gi gilaadeu.

¹⁴ Gai denga daane ne gaavee de hagailoo laa ne saavini i denga hoosa kemo a de hodooligi ma de hagamoolau ga hulo, i hiidinga de hagailoo a de hodooligi. Gai de hagailoo laa ne hagasauaa i de madaaolo go Susa.

¹⁵ Gai Mordecai ne sao ga hano gee mai i mada i mua o de hodooligi gu gahu i malo hodooligi buluu ma de tea, ma de hau i dahi hau goolo, gai dono malo laa daha e hai i *linen* tea ma de *purple*. Gai dangada i de aduhale go Susa gu lodo danuaa ma de malangilangi.

¹⁶ Gai de gau Ssuu gu ilaage ma de lodo danuaa, ma de malangilangi aama de hagadubu i daho dangada.

¹⁷ Gai de gau Ssuu e nnoho laa i denga vaaenga ma denga aduhale alodahi ne kave laa aagena de hagailoo a de hodooligi, gu lodo danuaa ma de malangilangi, gai gilaadeu ga daonga ma de malangilangi. Gai dangada soa o de henua laa gu hai gi ni dangada Ssuu, i hiidinga gilaadeu gu maatagu i de gau Ssuu.

† **8:12** *Adar* e bei go daha Daagelo (February) ma Manu (March).

9

De kii o de gau Ssuu

¹ Gai de madaangahulu ma dolu laangi huu o de madaangahulu ma lua malama, go de malama go Adar,* go de laangi e hagasula ai de hagailoo a de hodoologi. De laangi laa gai denga hagadaumee o de gau Ssuu ne tali e hagadee kii gilaadeu, aagai de hagailoo gu sui, gai de gau Ssuu ne hagadee kii ina dangada e kino i gilaadeu.

² Gai de gau Ssuu ne hagabuni i denga aduhale o denga vaaenga alodahi o de hodoologi go Ahasuerus, ga hebagi ange gi dangada e nnoho laa e daia gilaadeu. Gai teai dangada ne maua i de hai baasi ange gi de gau Ssuu, go hiidinga dangada alodahi gu maatagu i gilaadeu.

³ Gai dagi alodahi o denga vaaenga, ma denga goobenaa, ma de gau maolunga, ma sui o de hodoologi ga bale ange de gau Ssuu, i hiidinga gilaadeu gu maatagu i Mordecai.

⁴ Go hiidinga Mordecai gu kona mmao de maolunga i de hale o de hodoologi, gai ono longo gu dele i denga vaaenga alodahi, gai ia e hagadaga ange huu de mmahi.

⁵ Gai de gau Ssuu ne daa ga maakau olaadeu hagadaumee alodahi i de gadilaasa; gilaadeu ne oha ma de daa ga maakau dangada e kino i gilaadeu, aama de hai be ni aha alaadeu ne llodo e hai ange gi olaadeu hagadaumee.

⁶ Gai de gau Ssuu ne daa ga maakau e limalau dangada i de madaaolo go Susa.

* **9:1** Adar e bei go daha Daagelo (February) ma Manu (March).

⁷ Gai gilaadeu ne daa hogi ga maakau Parshandatha, ma Dalphon, ma Aspatha,

⁸ ma Poratha, ma Adalia, ma Aridatha,

⁹ ma Palmashta, ma Arisai, ma Aridai, ma Vaizatha,

¹⁰ go denga dama daane e dinoangahulu a Haman, tama daane a Hammedatha, de hagdamee o de gau Ssuu. Aagai de gau Ssuu tee kave donu dahi olaadeu goloa daudahi.

¹¹ Gai taelodo o dangada alodahi ne daa ga maakau i de madaaolo go Susa i de laangi laa, ne hagailoo ange gi de hodoooligi.

¹² Gai de hodoooligi ga hai ange gi de hine hodoooligi go Esther, “De gau Ssuu gu daa ma gu maakau e limalau daane aama denga dama daane e dinoangahulu a Haman i de madaaolo go Susa. Gai ni aha alaadeu gu hai i denga vaaenga o de hodoooligi ange laa? Gai se aha ange aau e lodo ai? Gai e gaavadu donu gi de goe. Gai se aha ange naa huu oou e dangidangi mai ai? Gai e hai donu hogi gi bei.”

¹³ Gai Esther ga hai ange, “Noo e heohi mai i oo daho e de hodoooligi, gai dugua ange hogi de gau Ssuu i Susa gi haia daiao gi se laangi e hagasula ai de hagailoo ne hai ange nei gi anailaa nei. Gai gilaadeu gi daudaulia age hogi dama daane a Haman i denga laagau.”

¹⁴ Gai de hodoooligi ne hagadaba bolo gi haia mee nei. Gai gu hagailoo muna laa i Susa, gai denga dama daane a Haman e dinoangahulu laa gu daudau i hongga denga laagau daudau.

¹⁵ Gai de gau Ssuu i Susa ne hagabuni hogi i de madaangahulu ma haa laangi o de malama go

Adar, ga daa gu maakau ange e dolulau daane i Susa, aagai tee kave olaadeu goloa.

¹⁶ Gai de gau Ssuu e nnoho laa i denga vaaenga o de hodooligi ange laa ne hagabuni hogi ga buibui gilaadeu ma de hagaola gilaadeu mai i olaadeu hagadaumee. Gai gilaadeu ne daa ga maakau e 75,000 dangada e kino laa i gilaadeu, gai tee kave olaadeu goloa.

¹⁷ Gai mee nei ne hai i de madaangahulu ma dolu laangi o de malama go Adar, gai de madaangahulu ma haa laangi huu o de malama, gai gilaadeu ga hagammabu ma de daonga ga malangilangi.

¹⁸ Gai de gau Ssuu e nnoho laa i Susa ne hagabuni i de madaangahulu ma dolu aama de madaangahulu ma haa laangi o de malama, gai gilaadeu ne hagammabu i de madaangahulu ma lima laangi o de malama laa ga daonga ma de malangilangi.

¹⁹ Deelaa ai, de gau Ssuu e nnoho laa i denga aduhale vaaligiligi ma aduhale e dee buibui, ne dao de madaangahulu ma haa laangi o de malama go Adar, ga hai gi se laangi niolaadeu e daonga ai ma de malangilangi, aama de duha ange gai gi dangada.

Taamada Taonga o de Purim

²⁰ Gai Mordecai ne sisi mee nei ga kave gi de gau Ssuu alodahi, i denga vaaenga o de hodooligi go Ahasuerus, i mommee e paa mai aama mommee e mmao,

²¹ ga hai gilaadeu gi dao de madaangahulu ma haa, ma de madaangahulu ma lima laangi o de malama go Adar i ngadahu alodahi,

²² go de laangi o de gau Ssuu ne ola mai ai i olaadeu hagadaumee, gai go de malama o olaadeu daemaha ne sui ai ga se malangilangi, gai olaadeu hinangalosaa ne sui ga se laangi hagammabu ma de daonga. Gai gilaadeu gi duuhaa gai i olaadeu magavaa ma de ngadi gaavange mee gi de gau hagaau aloha.

²³ Gai de gau Ssuu ne buni bolo e duudagi de hai mee alaadeu ne daamada laa de hai, bei de hai a Mordecai ne sisi ange ai laa gi gilaadeu.

²⁴ Gai Haman, tama daane a Hammedatha, taane Agag, de hagadaumee o de gau Ssuu alo-dahi, ne hagatau e hai baasi ange ma de daa gilaadeu gi maakau, gai ia gu lava i de dada de *Pur*, (go de mee e dada laa) e oha ai ma de daa ai gilaadeu gi maakau.*

²⁵ Aagai de masavaa a de hodoologi ne iloo ai de hagatau laa, gai ia ne hagadaba i de leda aana ne sisi ai laa, i dagodo o de hagatau baubau a Haman ne hai laa e hai baasi ange gi de gau Ssuu, bolo gi ahe ange donu huu gi de ia, gai gi daudaulia gilaadeu ma ana dama daane i hongga denga laagau.

²⁶ Deelaa ai, gilaadeu ne hogaingoo ange denga laangi laa go laangi o de *Purim*, de muna nei ne humai i de muna go de *Pur*. Go hiidinga o muna alodahi ne sisi i lo te leda nei, ma hai ngadaa aama mee ne hai ange gi gilaadeu,

* **9:24** Est 3.7

²⁷ gai de gau Ssuu ne hai de laangi nei gi se laangi e dao i olaadeu daha, ma olaadeu aamuli aama dangada alodahi gu hai laa gi ni dangada Ssuu. Gai gilaadeu ne duudagi de dao luu laangi nei, bei de hai gu sisi ai laa ma gu hagamodu ange gi denga ngadau alodahi.

²⁸ Gai luu laangi nei e hagamaanadu ma de dao i denga atangada alodahi, ma daho denga hagadiilinga alodahi i denga vaaenga ma aduhale alodahi. Gai luu laangi o de *Purim* gi dee tuu donu de dao i daho de gau Ssuu aama daho olaadeu aamuli.

²⁹ Gai de hine hodoologi go Esther, tamaa hine a Abihail, ma Mordecai, taane Ssuu ne sisi ange hogi dahi leda ga hagasauaa ma de hagadonu dagodo o laangi o de *Purim*.

³⁰ Gai Mordecai ne kave denga leda gi de gau Ssuu alodahi i denga vaaenga e 127 i de nohoanga hodoologi o Ahasuerus, i dagodo o de nnoho baba ma de muna abodonu,

³¹ gai gilaadeu gi dao ina luu laangi o de *Purim* laa i de masavaa gu hagailonga ange, bei de hai a Mordecai, taane Ssuu aama de hine hodoologi go Esther gu hagasauaa ange ai gi gilaadeu, bei delaadeu hai gu hagatau ai i olaadeu daha aama ange gi olaadeu aamuli delaadeu hai e hagahiikai ai aama de daemaha olaadeu lodo.

³² Muna a Esther ne hagasauaa de dao o luu laangi o de *Purim*, gai mee nei ne sisi ga daohi i lodo beebaa mulo.

10

De maolunga o Mordecai

¹ Gai de hodoologi go Ahasuerus ga hai dangada gi hagao ina taagisese, i de henua alodahi ga hano ai gi tagudai.

² Gai hegau alodahi ne hai i dono sauua ma ono mmahi, aama dagodo o tuulanga maolunga o Mordecai, ma de hagaamua a de hodoologi ia, gu sisi i lo te beebaa e daohi ai laa hegau a denga hodoologi o Media ma Persia.

³ Gai taane Ssuu go Mordecai, go togolua i lalo o de hodoologi go Ahasuerus, ia se daane maolunga i daho de gau Ssuu, ma de hagamahu i daho ono dangada, go hiidinga ia ne hagamahu ga ssala de mee e danuaa ange gi ono dangada donu, ma de hai hegau ange gi nnoho paba denga hagamahu alodahi.

xxx

De Beebaa Dabu
The Holy Bible in the Nukuoro language of Micronesia
copyright © 2022 Wycliffe Bible Translators, Inc.

Language: Nukuoro

Contributor: Wycliffe Bible Translators, Inc.

All rights reserved.

2025-03-14

PDF generated using Haiola and XeLaTeX on 13 Mar 2025 from source files
dated 14 Mar 2025

8ec6bba8-0c5e-54dd-94ca-afb07f24d254